

Кондак 1

Избранной от всех родов Божией Матери и Царице,
скоропослушливо внимлющей молитвам смиренным, и токи целебных
изливающей верным от иконы Своей святыя, благодарственное
приносим пение. Ты же, всемилостивая Заступнице, преклонися
благоутробно к гласом нашим хвалебным, и от всяких бед свободи
ны, зовущия Ти:

Радуйся, Всеблагая Скоропослушнице, прошения наша во благо
исполняющая.

Икос 1

Ангелов лица благоговейно Тебе служат, и вся небесныя силы
немолчными гласы Тя ублажают, Богородице Дево, яко рождшую
Ангелов Царя Христа Бога, мы же грешнии, подражати им
дерзающе, и достойно благохвалити Тя недоумеюще,
смирennemудренно вопием Ти сие:

Радуйся, неприступнаго Божества селение;

Радуйся, Ангельское непрестающее удивление.

Радуйся, Трапезо святая, хлебом жизни нас питающая;

Радуйся, маслино благоплодная, елеом милости сердца наша
умашающая.

Радуйся, даров Божия благодати сокровищнице неистощимая;

Радуйся, чудес реко приснотекущая.

Радуйся, обидимых заступнице;

Радуйся, печальных утешительнице.

Радуйся, бедствующих помощнице;

Радуйся, болящих целительнице.

Радуйся, разслабленных укрепительнице;

Радуйся, плененных свободительнице.

Радуйся, Всеблагая Скоропослушнице, прошения наша во
благо исполняющая.

Кондак 2

Видяще милосердие Твое неисчетное, Владычице, и многая
чудеса, Тобою явленная и присноявляемая чрез святыя иконы
Твоя, имиже, яко звездами богосветлыми, весь мир христианский
украсила еси, величаем Тя, возвеличившую род наш Твоим
благоволением, и с любовию поклоняемся пречистаго лика Твоего
изображению, зовуще Сыну Твоему Христу Богу: Аллилуиа.

Икос 2

Разум небесный открывая, Богородице, благоволила еси в
земном жребии Твоем, святей горе Афонстей, многими чудесы
прославити икону Твою, юже Сама Скоропослушницею наименовала
еси гласом Божественным от нея изшедшим, да вси ведуще таковое
Твое о ней благоволение, песенно Тебе вопиют:

Радуйся, милосердая всех нас о Христе Мати;

Радуйся, Духа Святаго жилище.

Радуйся, любви Божия к человеку проявление;

Радуйся, рода человеческого возвышение.

Радуйся, светлая палато Бога Слова;

Радуйся, Святая святых большая.

Радуйся, рождающая Божественнаго Агнца;

Радуйся, возрастившая нам клас живота.

Радуйся, брашна негиблющаго стамно всезлатая;
Радуйся, питательнице Питателя вселенныя.
Радуйся, яко предстательством Твоим спастися уповаем;
Радуйся, яко молитвами Твоими наследие небесное получитьи чаем.

Радуйся, Всеблагая Скоропослушнице, прошения наша во благо исполняющая.

Кондак 3

Силою Божиею действующи, неблагоговейно ходившаго пред святою Твоею иконою Дохиарския обители трапезаря Нила слепотою и разслаблением тела наказала еси, Богородице Дево, да прочее не дерзает оскорбляти Тя в пречистом Твоем образе, егоже в залог благоволения Твоего всей Афонстей горе даровала еси милостиво, да все насельницы ея гласы преподобными вопиют рождшемуся от Тебе Богу Слову: Аллилуиа.

Икос 3

Имея любовь велику к людям, искупленным Кровию Сына Твоего и Бога, Владычице Всеблагая, покаяние трапезаря Нила милостиво прияла еси и исцеление ему от слепоты и разслабления даровала еси, да служит непрестанно Тебе и молитвы немолчныя приносит Ти пред многоцелебною Твоею иконою, взывая сице:

Радуйся, Иоакима и Анны прозябение святое;
Радуйся, рождающая Сокрушившаго главу древляго змия.
Радуйся, Преблагословенная в женах;
Радуйся, рождающая нетленно Спаса душ наших.
Радуйся, девство и рождество чудесно сочетавшая;
Радуйся, во обок непорочно Себе сохраняющая.
Радуйся, всея вселенныя велие чудо;
Радуйся, всех родов земных удивление.
Радуйся, согрешающих исправление;
Радуйся, кающихся в добродетели утверждение.
Радуйся, непамятозлюбная наказательнице;
Радуйся, благосердная вразумительнице.
Радуйся, Всеблагая Скоропослушнице, прошения наша во благо исполняющая.

Кондак 4

Бури житейския избежавши, и в тихое пристанище спасения на гору Афонскую притекшии, обретают зде утешение благодатное и помощь Божественную от святыя иконы Твоей, Богородице, от неяже лучи чудес испускаеши, и токи милости Твоея изливаеши неоскудно. Темже вси хотящи в пустынях Афона жати спасение, величая матерняя щедроты Твоя, благодарственно воспевают Богу: Аллилуиа.

Икос 4

Слышав глас Божественный от святыя иконы Твоея, Владычице, трапезарь Нил позна Тя Скоропослушницу быти всем, с верою и любовию притекающим к чудотворному Твоему образу, и прияв от него вразумление своему невежеству и прозрение своим слепотствующим очесем, возгласи Тебе благодарственно от души:

Радуйся, временным наказанием невежд умудряющая;

Радуйся, согрешающих покаяние милостиво приемлющая.
Радуйся, на путь исправления заблуждающихся направляющая;
Радуйся, раны греховныя благоутробно врачующая.
Радуйся, в нерадении коснеющих любвеобильно обличающая;
Радуйся, горестию телесных страданий вечных мук
избавляющая.
Радуйся, волнение страстей утишающая;
Радуйся, руку помощи Твоея погибающим простирающая.
Радуйся, безнадежных надеждо;
Радуйся, скорбящих отрадо.
Радуйся, нагих одеяние;
Радуйся, сирых призрение.
Радуйся, Всеблагая Скоропослушнице, прошения наша во
благо исполняющая.

Кондак 5

Боговещанныя глаголы Твоя уведевше иноцы обители
Дохиарския, Тебе, Божественней Скоропослушнице, храм соорудиша
при трапезе, идеже чудотворная икона Твоя пребывает, Пречистая
Дево, и вся верныя утешает знаменьями Твоея милости, еяже не
лиши и нас смиренных по долгу Тя воспевающих, и вопиющих чудес
Творцу Богу: Аллилуиа.

Икос 5

Видевше токи чудес, от святых иконы Твоея Скоропослушницы
источаемыя, вси иноцы горы Афонския стекахуся к ней на
поклонение. Ты же, Мати Божия, всем, по коегождо потребе, дары
милости Твоея неоскудно подавала еси от чудотворнаго Твоего
образа, подвизая благодарно вопити Тебе:

Радуйся, Мати милосердия и щедрот;
Радуйся, одушевленный Престолуе Вседержителя.
Радуйся, Сыну Божию плоть заимодавшая;
Радуйся, чертоже безсеменнаго уневещения.
Радуйся, Безплотнаго воплотившая;
Радуйся, Бога с человеки соединившая.
Радуйся, преподобных всежелательное зрение;
Радуйся, постников Божественное радование.
Радуйся, пустынножителей тихое веселие;
Радуйся, иноков крепкое упование.
Радуйся, демонския полки побеждающая;
Радуйся, враги спасения человеческого посрамляющая.
Радуйся, Всеблагая Скоропослушнице, прошения наша во
благо исполняющая.

Кондак 6

Проповедует гора Афонская милости и чудеса Твоя,
Преблагословенная Мати Господа нашего, и светло красуется
многими чудотворными Твоими иконами, посреде коих икона Твоя,
Скоропослушница Тобою нареченная, яко луна полная, лучами
чудес немерцаемо сияет, просвещая души наша светом Божия
благодати, и подвизая нас хвалебно взывати прославленному Тя
Триединому Богу: Аллилуиа.

Икос 6

Возсияла еси в пречистой иконе Твоей, Марие Богородице, свет спасения всем, блуждающим во тьме грехов и страстей, и сию нарекла еси Скоропослушницею, молящимся пред нею с верою и благоговением от души, скорую помощь Твою подаючи вопиющим Ти таковая:

Радуйся, молние, души просвещаай;

Радуйся, громе, соблазняющия устрашай.

Радуйся, благоотитное прибежище утомленных треволнением житейского моря;

Радуйся, небурное пристанище обуреваемых волнами страстей.

Радуйся, юных наставнице целомудрия;

Радуйся, покрове и ограждение девства.

Радуйся, окаменение сердечное умягчающая;

Радуйся, хладность душевную благодатно согревающая.

Радуйся, на стезю спасения верных наставляющая;

Радуйся, от путей погибельных претыкающихся удаляющая.

Радуйся, Споручнице наша к Сыну Твоему и Богу;

Радуйся, присно умоляющая Его о помиловании нас грешных.

Радуйся, Всеблагая Скоропослушнице, прошения наша во благо исполняющая.

Кондак 7

Хотяши всем показати любовь Твою велию к христианскому роду, Богородице Преблагая, в жребий Твой земный гору Афонскую избрала еси, и в ней селения иноческая умножила еси, да вси обуреваемии мирскою суетою, возмогут обретати zde тихое и удобное пристанище ко спасению и, Тобою вспомошествуеми, сподобятся наследия небеснаго и пети со святыми Пресвятей Троице: Аллилуиа.

Икос 7

Новое знамение милосердия Твоего явила еси, Владычице, в чудесном прославлении святых иконы Твоя Скоропослушницы, не токмо иноком горы Афонския, но и всем православным христианом, в нихже благоговейно чествуется сея иконы Твоя изображение, да вси Тебе зовут:

Радуйся, Бога нашего Мати;

Радуйся, в рождестве и по рождестве Дево.

Радуйся, яко Тя блажат вси роди;

Радуйся, яко сотвори Тебе величие Сильный.

Радуйся, яко призре на смирение Твое Господь;

Радуйся, яко возжелe доброты Твоя Царь царей.

Радуйся, Дщи благословенная Отца Небеснаго;

Радуйся, Родительнице неискусомужная Сына Предвечнаго.

Радуйся, приятелище непорочное Духа Святаго;

Радуйся, таиннице Божественных благодати.

Радуйся, горняго мира украшение;

Радуйся, дольняго мира заступление.

Радуйся, Всеблагая Скоропослушнице, прошения наша во благо исполняющая.

Кондак 8

Странники и пришельцы есмы на земли и, по глаголу

апостола, не имамы зде пребывающаго града, но к кому прибежем, Владычице, в скорбех странствия нашего, аще не к Тебе, Всеблагая? Не отвержи нас, Мати Божия, не рцы нам: «не вем вас, грехов ради ваших!», но помилуй нас, сырых и беспомощных, и прими нас в вечныя кровы. Покровительнице наша, да радостно вопием во славе небесней Царю славы Христу: Аллилуиа.

Икос 8

Всем верным утешительно есть взирати на святую икону Твою, Владычице, на нейже зрим Тя, на руку Твоею держащую Превечнаго Младенца Господа нашего Иисуса Христа, Емуже поклоняющесе боголепно яко Творцу и Богу нашему, Тебе, истинней Богородице, умиленно глаголем:

Радуйся, обрадованная архангельским благовещением
Приснодево;

Радуйся, Невесто Неневестная.

Радуйся, Мати Света умнаго, всех души просвещающаго;

Радуйся, Престоле одушевленный небесе и земли Творца.

Радуйся, кроткая голубице;

Радуйся, непорочная агнице.

Радуйся, чаше, черплющая радость;

Радуйся, неисчерпаемый сосуде воды животныя.

Радуйся, мироположнице благоухания Христова;

Радуйся, Еюже злосрадие страстей наших отгонится.

Радуйся, Еюже познахом Сына Божия;

Радуйся, Еюже научихомся поклонятися Троидиному Богу.

Радуйся, Всеблагая Скоропослушнице, прошения наша во благо исполняющая.

Кондак 9

Вси роди блажат Тя по долгу, благословенная Марие Богородице, от востока бо и до запада хвально имя Твое, иноков же лица Покровительницу Тя свою именуют, наипаче подвизающийся в жребии Твоем горе Афонстей, юже особым благоволением Твоим осенила еси, многая чудеса в ней содевающи и милости Твоя богатая насельником ея являющи, да благодарно вопиют о Тебе Богу: Аллилуиа.

Икос 9

Витии суемудреннии недоумевают познати тайну Твоего приснодевства, Богородице, ниже могут изъяснити силу чудотворную, от икон Твоих проистекающую, во исцеление недужных, и на всяку пользу душевную и телесную человеком. Мы же православно и несомненно Приснодевою Тя исповедующе, верно поклоняемся иконе Твоей святей, и вопием Ти сие:

Радуйся, неверных сумнительное слышание;

Радуйся, верных известная похвало.

Радуйся, из боку чисту Христа нетленно рождающая;

Радуйся, ключи девства невредившая в рождестве Твоем.

Радуйся, Мати и Дево Препоблагословенная;

Радуйся, Богородице препрославленная.

Радуйся, дев величание;

Радуйся, матерей присное радование.

Радуйся, едина непорочная и добрая в женах;
Радуйся, рождающая обетованного Сокрушителя главы змия.
Радуйся, падших прародителей осуждения древняго
избавляющая;
Радуйся, Эдем заключенный человеком отверзшая Рождеством
Твоим.
Радуйся, Всеблагая Скоропослушнице, прошения наша во
благо исполняющая.

Кондак 10

Спасение устрояющи христоименитым людям, благоволила еси,
Богородице, земный жребий Твой, гору Афонскую, в население
иноком определить, и рекла еси в видении первому
пустынножителю Афонскому, преподобному Петру, быти горе сей в
жилище иноком присное, обетовании благими утешивши его, яко
будеши Помощница и Покровительница всем, подвижающимся в ней
богоугодно, дарами потребными их снабдевающи, и от всяких бед
спасающи, да невозбранно поют Богу: Аллилуиа.

Икос 10

Стена еси заступления, Дево, иноком православным, и всем
подвижником девства и чистоты. Темже жребий Твой земный, гору
Афонскую, невходну женам сотворила еси, да без соблазна
греховнаго пребывают в ней иноцы, на Тебе едину по Бозе
надежду спасения возлагающе, и Тебе зовуще сице:

Радуйся, неувядаемый цвете девства;
Радуйся, крине сельный чистоты.
Радуйся, светоносная сене небесная, ревнителей чистоты
осеняющая;
Радуйся, премудрости Божия свитче, рачителей целомудрия
умудряющая.
Радуйся, иноком благоподвижающимся Ходатаице спасения;
Радуйся, пустынножителей горы Афонския Покрове и
Ограждение.
Радуйся, радость благодатную изливающая в сердца
боголюбивая;
Радуйся, утешение духовное подающая душам огорченным.
Радуйся, младопитательнице дев и безматерних сирот;
Радуйся, любовь Жениха безсмертнаго девственна
ликостояния услаждающая.
Радуйся, в тяжкой борьбе с приражениями страстей плотских
крепкая помощнице;
Радуйся, обителей иноческих неусыпная блюстительнице.
Радуйся, Всеблагая Скоропослушнице, прошения наша во
благо исполняющая.

Кондак 11

Пение наше смиренное, от полноты любве и усердия Тебе
приносимое, не презри, Чистая, и не отвратися от нас,
оскверненных многими грехми, но помози нам, Всеблагая,
покаянием очиститися от скверны греховных, и преуспети в
чистем и богоугоднем житии, Тя подвигоположницу и помощницу в
сем имуще, да возможем достойно и праведно вопити ко Господу:
Аллилуиа.

Икос 11

Светлыми лучами чудес святая икона Твоя немерцаемо сияет, Богородице Дево, и весь мир благодатно озаряет, прогоняючи всякое вражие действо силою Божиею, от нея исходящую; темже радуемся мы, грешнии, имуще таковой залог Твоего к нам благоволения, и Тебе, Скоропослушнице молений наших, благодарственно взываем:

Радуйся, деннице Солнца незаходимаго;

Радуйся, заре дне невечерняго.

Радуйся, утро спасения нам возсиявшая;

Радуйся, рождающая Жениха безсмертнаго душ человеческих.

Радуйся, желания наша богоугодная исполняющая;

Радуйся, в скорбех и обстояниях на помощь к нам благоутробно ускоряющая.

Радуйся, раю мысленный, всякаго утешения духовнаго преисполненный;

Радуйся, от исполнения Твоего и нам капли утешения источающая.

Радуйся, зной страстей наших прохлаждающая;

Радуйся, благодатное безстрастие ищущим его усердно подающая.

Радуйся, всех в чистоте целомудрия живущих зело любящая;

Радуйся, в сонних и видениях избранники Божия посещающая.

Радуйся, Всеблагая Скоропослушнице, прошения наша во благо исполняющая.

Кондак 12

Благодать Божия, присущая святей иконе Твоей, Скоропослушница Тобою нареченной, Богомати Владычице, влечет к ней всех скорбящих и обремененных, и не тщи отходят они от сего источника Твоих милостей и щедрот: в скорбех отраду, в напастех защиту, в болезнях цельбу неоскудно получая от чудотворнаго образа Твоего, Всеблагая, и благодарственно вопиют благих подателю Богу: Аллилуиа.

Икос 12

Поуще чудеса Твоя, Владычице, и велию милость Твою к христианскому роду, вемы, яко недовольни есмы к достойному прославлению Тебе, честнейшей Херувим и славнейшей без сравнения Серафим, обаче надеющиеся на безприкладное милосердие Твое, Всеблагая, смиренномудренно приносим Ти песни таковыя:

Радуйся, пристанище небурное подвижников благочестия;

Радуйся, безмолвствующих сладкая собеседнице.

Радуйся, в пустынях и горах скитающихся благодатная отрадо;

Радуйся, тайных среди мира рабов Божиих тайное вразумление.

Радуйся, грешников кающихся с Богом примирение;

Радуйся, горы Афонския верховная правительнице.

Радуйся, Петра пустыннолюбиваго посещением Твоим zde озарившая;

Радуйся, Афанасия богомудраго явлением Твоим zde благодатствовавшая.

Радуйся, многия преподобных Афонских славою небесною прославльшая;
Радуйся, насельником горы сея особую любовь Твою являющая.
Радуйся, телес наших безмездная целительнице;
Радуйся, душ наших к Царствию Горнему путеводительнице.
Радуйся, Всеблагая Скоропослушнице, прошения наша во благо исполняющая.

Кондак 13

О Всепетая Мати, Скоропослушницею нарекаяся во святей иконе Твоей, Богородице Марие! Приими милостивно сие малое моление наше, еже от усердия нашего принесохом Ти с верою и любовию, и умоли приснопокланяемую Троицу избавити ны геенны огненныя, тьмы несветимыя и мучения вечнаго, да предстательством Твоим унаследим Царствие Небесное и сподобимся со святыми пети Богу: Аллилуиа.

Этот кондак читается трижды, затем 1-й икос «Ангелов лица благоговейно...» и 1-й кондак «Избранной от всех родов...».

Молитва Божией Матери ради иконы Ее «Скоропослушница»

Препоблагословенная Владычице Приснодево Богородице, Бога Слова паче всякаго слова на спасение наше рождшая, и благодать Его преизобильно паче всех приявшая, море явльшаяся Божественных дарований и чудес приснотекущая река, изливающая благодать всем, с верою к Тебе прибегающим! Чудотворному Твоему образу припадающе, молимся Тебе, Всещедрей Матери Человеколюбиваго Владыки: удиви на нас пребогатая милости Твоя, и прошения наша, приносимая Тебе, Скоропослушнице, ускори исполнити, все еже на пользу во утешение и спасение коемуждо устрояющи. Посети, Преблагая, рабы Твоя благодатию Твоею, подаждь недугующим цельбу и совершенное здравие, обуреваемым тишину, плененным свободу и различными образы страждущих утешити; избави, всемилостивая Госпоже, всяк град и страну от глада, язвы, труса, потопа, огня, меча и иныя казни временныя и вечныя, матерним Твоим дерзновением отвращающи гнев Божий; и душевнаго расслабления, обуревания страстей и грехопадений свободы рабы Твоя, яко да непреткновенно во всяком благочестии поживше в сем веце, и в будущем вечных благ сподобимся благодатию и человеколюбием Сына Твоего и Бога, Емуже подобает всякая слава, честь и поклонение, со Безначальным Его Отцем и Пресвятым Духом, ныне и присно и во веки веков. Аминь.

Тропарь Божией Матери ради иконы Ее «Скоропослушница»

Тропарь, глас 4:

К Богородице притецем сущии в бедах, и ко святей иконе Ея ныне припадем, с верою зовуще из глубины души: скоро наше услыши моление, Дево, яко Скоропослушница нарекаяся, Тебе бо ради рабы Твои в нуждах готовую Помощницу имамы.

Кондак, глас 8:

В мори житейстем обуреваемии, треволнению подпадаем страстей и искушений. Подаждь убо нам, Госпоже, руку помощи,

якоже Петрови Сын Твой, и ускори от бед избавити ны, да зовем Ти: радуйся, Всеблагая Скоропослушнице.

Величание

Величаем Тя, Пресвятая Дево, Богоизбранная Отроковице, и чтим образ Твой святой, имже точиши исцеления всем с верою притекающим.

[Празднование 9/22 ноября](#)